

दिनांक 05.01.2025

समय: 18.45 बजे

आकाशवाणी जयपुर

प्रादेशिक समाचार

- उपराष्ट्रपति जगदीप धनखड देश रा विकास सारू राष्ट्रवाद, संगठन अर राष्ट्र प्रथम दृष्टिकोण ने जरूरी बताया।
- केन्द्रीय स्वास्थ्य मंत्रालय कह्यो है के लारला कुछ हफतां मांय चीन मांय पसर्या एच.एम.पी. वायरस ऊं घबरावण री जरूरत नी—मंत्रालय कानी ऊं हालात माथे करड़ी निजर।
- गुरु गोविन्द सिंह जी री जयंती काले—राज्यपाल अर मुख्यमंत्री प्रदेशवासियां ने शुभकामनावां दी।
- राज्य मांय आवता 4—5 दिनां मांय मौसम साफ़ रहवण अर घणकरां हलकां मांय तापमान मांय दो ऊं चार डिग्री सेल्सियस गिरावट कमी आवण रा आसार।

000

उपराष्ट्रपति जगदीप धनखड कह्यो है के कोई ई देश जद तांई आगे नी बध सके है जद तांई उण रा रहवासी राष्ट्रवाद रे प्रति पूरण समर्पित नी होवे। दिल्ली मांय वह्या एन.सी.सी. गणतंत्र दिवस शिविर मांय बोलता श्री धनखड कह्यो के भारत रा विकास सारू राष्ट्रवाद, संगठन अर राष्ट्र प्रथम दृष्टिकोण री जरूरत है। उपराष्ट्रपति कह्यो के देश रो बदलाव पांच बुनियादी सिद्धांतां— सामाजिक सौहार्द, जमीनी थर माथे देशभक्ति रा मोल री सीख देवण, पर्यावरण रा बारा मांय जाग जगावण, आत्मनिर्भरता अर नागरिक कर्तव्यां माथे निर्भर है। श्री धनखड लोगां अर नौजवानां ऊं अरज करी के वे भारत ने अनुशासन अर शिष्टाचार वाळां गौरवशाली देश मांय बदलण सारू आं पांच सिद्धांतां रो पाळण करे।

000

केंद्रीय स्वास्थ्य मंत्रालय कह्यो है के लारला कुछ हफता मांय चीन मांय पसर्या एचएमपी वायरस ऊं घबरावण री जरूरत नी है। मंत्रालय

कह्यो के वो हालात माथे करड़ी निज़र राख्या है। मंत्रालय लोगां ने ई सावचेती बरतण ने कह्यो है। मंत्रालय कानी ऊं कानी कही ज्यो है के भारतीय आयुर्विज्ञान अनुसंधान परिषद –आईसीएमआर एचएमपी वायरस रा परीक्षण सारू प्रयोगशालावां री तादाद मांय बढ़वार करेला अर आखे साल ई वायरस री प्रवृत्तियां माथे निगै तय करेला। मंत्रालय रो भेळां निगराणी समूह कह्यो के आईसीएमआर अर आईडीएसपी नेटवर्क री मार्फत इन्फ्लुएंजा जसी बीमारी अर इन्फ्लुएंजा सारू सांस री गंभीर बीमारी ने ले र निगराणी प्रणाली भारत मांय पैला ऊं ई मौजूद है।

000

केंद्रीय इस्पात अर भारी उद्योग मंत्री एच.डी कुमारस्वामी काले नुवी दिल्ली मांय इस्पात उद्योग सारू 'पीएलआई योजना वन पॉइंट वन' री सरूआत करेला। उत्पादन ऊं जुड़या प्रोत्साहन–पीएलआई री अवधारणा 2020 रा वैश्विक लॉकडाउन रे दौरान तियार करी ज्यी ही, जिण मांय घरू विनिर्माण ने बधावो देवण री जरूरत माथे जोर दीरी ज्यो हो। सरूआत मांय तीन हलकां सारू सरू करी ज्यी पीएलआई योजना ने पछे नवंबर 2020 मांय पसारो देवता इण मांय स्टील ने ई भेळा कर लीरी ज्या। इस्पात मंत्रालय री पीएलआई योजना ऊं 27 हजार 106 करोड़ रिप्यां रा निवेश 14 हजार 760 लोगां ने सीधा रूजगार अर 7.90 मिलियन टन 'स्पेशलिटी स्टील' रा अनुमानित ने चाकी ज्या है। नवंबर 2024 ताई, कंपनियां पैला ई 18 हजार 300 करोड़ रो निवेश कर दियो है अर 8 हजार 660 ऊं बत्ती रूजगार सृजित कर्या है।

000

जयपुर रा भांकरोटा गैस टैंकर अग्निकांड मांय हताहतां ने आर्थिक मदद देवण रो काम सरू व्हे ग्यो है। इण रे तैत मरण वाळां रा आश्रितां रा बैंक खातां मांय मुख्यमंत्री सहायता कोष ऊं कुल एक करोड़ रिप्यां री रकम दीरीजी है।

इण रे अलावा **राष्ट्रीय राहत कोष** ऊं हर मरण वाळां रा पिरवार जणा ने दो लाख रिप्यां हर घायल ने 50 हजार रिप्यां री आर्थिक मदद दिरावण सारू जयपुर जिला प्रशासन कानी ऊं सगळी जरूरी कार्यवाही पूरी कर लीरीजी है।

000

विधानसभा अध्यक्ष वासुदेव देवनानी आज अजमेर, ब्यावर अर पाली ज़िला रा दौरा माथे रह्या। ई दौरान वणा न्यारा-न्यारा कार्यक्रमों मांय सिरकत करी। वणा अजमेर रा हरिभाऊ नगर रा नुवां पुलिस थाणा रो उद्घाटन कर्यो। ब्यावर मांय वणा ज़िला अस्पताल सारू दीरी ज्यी भूमि रो पूजन कर ने नींव धरी। ई दौरान ज़िला कलेक्टर बतायो के जिला अस्पताल सारू 30 बीघा जमीन आवंटन रे साथै ई मेडिकल कॉलेज सारू ई जमीं रिजर्व करी ज्यी है। वठे पाली मांय श्री देवनानी अखिल भारतीय विद्यार्थी परिषद रा 60 वां प्रान्त अधिवेशन रो उद्घाटन कर्यो। वणा शिक्षा ने रोजगार देवण वाळी बणावण माथे जोर दियो।

000

गुरु गोविन्द सिंह जी री जयंती काले मनाई जावेला। प्रकाशोत्सव ने ले र हनुमानगढ़ ज़िला रा टिब्बी कस्बा मांय आज नगर कीर्तन निकाळी ज्यो। नगर कीर्तन री सरूआत श्री गुरुद्वारा सिंह सभा ऊं पंज प्यारां री अगुवाई मांय व्ही। नगर कीर्तन रो गांव मांय ठौड़-ठौड़ फूल बरसा र स्वागत करी ज्यो। राज्यपाल हरिभाऊ बागडे खालसा पंथ रा संस्थापक दसवां गुरु गोविन्द सिंह जी रा प्रकाशोत्सव रे मौके शुभकामनावां दी है। श्री बागडे आप रा संदेश मांय कह्यो के गुरु गोविन्द सिंह सिखां रा दसवां गुरु होवण रे साथै ई संत सिपाही हां। वणा रो संपूरण जीवन त्याग, तपस्या अर बलिदान रा गुणां ऊं भर्यो हो। मुख्यमंत्री भजन लाल शर्मा ई गुरु गोविन्द सिंह जी री जयंती माथे प्रदेशवासियां ने शुभकामनावां दी है। मुख्यमंत्री ई मौके प्रदेशवासियां ऊं गोविन्द सिंह जी रा जीवन मूल्यां ने अपणावण री ई अरज करी।

000

राष्ट्रीय कृषि अर ग्रामीण विकास बैंक —नाबार्ड रा अध्यक्ष शाजी के वी ने कह्यो है नुवी दिल्ली मांय चाल रह्या ग्रामीण भारत महोत्सव री मार्फत ग्रामीण भारत री उद्यमिता री भावना अर सांस्कृतिक धरोहर रो दरसाव कर्यो जावे। श्री शाजी कह्यो कि ई महोत्सव रो मकसद ग्रामीण भारत रा उत्पादां ने शहरी उपभोक्तावां सामी लावणो है। वणा बतायो कि ई महोत्सव मांय जीआई टैग वाळा उत्पादां, जैविक उत्पादां अर महिला उद्यमियां अर जनजातीय लोगां रा उत्पादां ने दरसाया जावे।

000

जम्मू कश्मीर रा बांदीपुरा मांय काले व्ह्या सड़क हादसा मांय मरण वाळां सेना रा चार जवानां मांय ऊं दो राजस्थान रा है। आ मांय एक जवान नितिश यादव बहरोड़ रा रिवाली गांव रा हा। वटे ई हवलदार हरिराम रेवाड नागौर जिला रा राजोद गांव रा हा। रेवाड री पार्थिव देह चंडीगढ ऊं वां रा पैतृक गांव राजोद लायी जाय री है। जठे वां ने अंतिम विदाई दी जायेला ।

000

प्रदेश रा घणकर ठौड़ां तापमान मांय बढ़वार होवण ऊं लोगां ने ठण्ड ऊं आराम मिल्यो है। राज्य मांय सब ऊं कम 6 दशमलव 4 डिग्री सेल्सियस कमती रो तापमान माउंट आबू मांय दर्ज व्ह्यो। टोंक रा वनस्थली मांय 6 दशमलव 9, अलवर मांय 7 दशमलव 2, सिरौही मांय 7 दशमलव 9, डबोक मांय 9 दशमलव 1, जैसलमेर मांय 8 दशमलव 3, करौली मांय 10 दशमलव 6 अर राजधानी जयपुर मांय 11 डिग्री सेल्सियस कमती रो तापमान रिकॉर्ड करी ज्यो। ई बीचे प्रदेश मांय केई ठौड़ां कोहरा ऊं जिन्दगी माथे असर पड़्यो है। दौसा मांय आज घणी धूअंर छाया री। कोहरा रा असर ऊं रेल अर सड़क यातायात माथे ई असर पड़्यो है। डीग जिला मांय तेज ठण्ड अर धूअंर रे कारण आम जिन्दगी माथे असर व्ह्यो है। सर्दी रे चालता जिला कलेक्टर जिला रा सगळां आंगनबाड़ी केन्द्रां माथे 10 जनवरी ताई छुट्टी ऐलाण करी है। श्रीगंगानगर ऊं म्हारा खबरनवीस बतायो के आज आखे दिन कोहरा रो असर निजर आयो।

मौसम केन्द्र जयपुर मुजब राज्य मांय आवता 4-5 दिन मौसम सुखो रहवण अर घणकरां हलकां मांय कमती अर बत्ती रा तापमान मांय 2 ऊं 4 डिग्री सेल्सियस ताई री कमी आवण री आस है। बीकानेर, जयपुर अर भरतपुर संभाग रा कुछ हलकां मांय आवता दो-तीन दिन घणी धूअंर छाया रह सके है। वटे ई आथूणी विक्षोभ रे सक्रिय होवण ऊं 10 ऊं 12 जनवरी रे दौरान प्रदेश रा कुछ हलका मावठ होवण अन्दाजो है।

000

प्रदेशभर मांय सड़क सुरक्षा माह रे दौरान न्यारी—न्यारी सड़क सुरक्षा जागरूकता गतिविधियां करी जावे। ई कड़ी मांय भरतपुर मांय परिवहन महकमां कानी ऊं आज वाहन चालकां ने नुक्कड़ नाटक री मार्फत सड़क माथे वाहन चलावती बगत कायदां रो पालन करण सारू जाग जगावण वाळा संदेश दीरीज्या। कलाकारां शहर रा न्यारा—न्यारा ठौड़ां दुपहिया वाहन चलावती बगत हैलमेट लगावण अर चौपहिया वाहन चलावती बगत सीट बैल्ट लगावण री सलाह देवता गैर जिम्मेदारी ऊं वाहन चलावण माथे होवण वाळां हादसा रा बारा मांय जाणकारी दी। ई दौरान यातायात नियमां री जाणकारी ई दीरीजी।

000

बीकानेर मांय अंतराष्ट्रीय ऊंट उत्सव रो आयोजन 10 ऊं 12 जनवरी ताईं व्हेला। उत्सव ने ले र प्रशासन तैयारियां सरू कर दी है। आज ऊंट उत्सव सारू शहर रा लक्ष्मीनाथ मंदिर मांय गढ़ गणेश री पूजा—अर्चना कर ने पीळा चावळ बांट ने आवण री मनुहार सरू व्ही। ई मौके विधायक जेठानंद व्यास कह्यो की ई आयोजन मांय स्थानीय संस्कृति री देशी—विदेशी सैलाणियां ने बत्ती ऊं बत्ती जाणकारी मिले इण री कोशिश करी जायेला। तीन दिन रा उत्सव री सरूआत हेरिटेज वॉक रे साथे व्हेला। उत्सव मांय ऊंटां ऊं जुड़ी न्यारी न्यारी होड़ा ई व्हेला।